



Sandžacka demokratska partija



Stranka demokratske akcije Sandžaka

PREAMBULA

Čvrsto opredijeljeni za demokratiju, evropske i evroatlantske integracije Srbije i izgradnju Srbije kao regionalizovane i decentralizovane države, zasnovane na temeljima vladavine prava, pravne sigurnosti i jednakosti pred zakonom;

Privrženi očuvanju i unaprjeđenju međunacionalnog povjerenja u Sandžaku;

Imajući u vidu pravo i potrebu Bošnjaka na zaštitu, očuvanje i unaprjeđenje svog nacionalnog identiteta i prava garantovanih Ustavom i zakonima Republike Srbije i normama međunarodnog prava;

U cilju uspostavljanja političke stabilnosti i pozitivne političke klime u Sandžaku, punog ostvarivanja ljudskih, političkih i socijalno – ekonomskih prava, kao i prava građana Sandžaka na brži ekonomski razvoj;

Stranka demokratske akcije Sandžaka i Sandžacka demokratska partija (u daljem tekstu potpisnice) donose

DEKLARACIJU o strateškom partnerstvu

I

Ovom Deklaracijom o strateškom partnerstvu, njene potpisnice uređuju i utvrđuju oblasti međusobne saradnje, kao i sva druga pitanja od značaja za implementaciju ove Deklaracije.

II

Uvažavajući programske razlike, zadržavajući politički identitet i samostalnost u radu, potpisnice će učiniti sve da afirmišu Deklaraciju i njene proklamovane ciljeve, za koje postoji obostrana saglasnost.

III

Ključni cilj ove Deklaracije jeste puna politička i društvena stabilnost u Sandžaku, što podrazumijeva i smanjenje tenzija i podjela među građanima, posebno među Bošnjacima.

IV

Ciljevi Deklaracije su:

a) Ekonomsko osnaživanje Sandžaka i razvoj infrastrukture zalaganjem za realizaciju sljedećih projekata, u skladu sa mogućnostima, i to:

- izgradnja dionice autoputa Beograd – Južni Jadran (Koridor 11), koja će prolaziti kroz Sandžak preko Pešterske visoravni;
- izgradnja zaobilaznice oko Novog Pazara;
- izgradnja regionalne putne mreže u cilju povezivanja sandžačkih opština;
- izgradnja gasovoda Aleksandrovac – Brus – Raška – Novi Pazar – Tutin;
- izgradnja regionalne razvojne zone Tutin;
- izgradnja elektro-energetskih objekata naponskog nivoa 110 KV (TS 110KV/X Novi Pazar 3, TS 110 KV/X Tutin, TS 110 KV/X Ljeskova, DV 110 KV Kraljevo – Novi Pazar, DV 110 KV Sjenica – Ljeskova – Tutin), izgradnja hidroelektrane na Ibru, kao i vjetroelektrane na Pešteri;
- restauracija Stare čaršije u Novom Pazaru i ostalih spomenika kulture;
- završetak projekta „Program povratka i održivog opstanka prognanih i interno raseljenih Bošnjaka opštine Priboj“;
- podrška i učešće na Sandžačkim igrama;
- realizacija drugih projekata za koje budu obezbijeđena finansijska sredstva;

b) Osnivanje institucija, organizacija i službi u Sandžaku, u skladu sa mogućnostima, kao što su:

- osnivanje Kliničkog centra u Novom Pazaru;
- uspostavljanje Školske uprave u Novom Pazaru;
- osnivanje Zavoda za zaštitu spomenika kulture u Novom Pazaru;
- povećanje institucionalnog i organizacionog statusa carine u Novom Pazaru;
- osnivanje Pravosudne akademije u Novom Pazaru;
- uspostavljanje osnovnog suda za Tutin; Privrednog suda sa sjedištem u Novom Pazaru i povećanje broja javnih bilježnika za sandžačke opštine.

c) Saradnja na iznalaženju modela decentralizacije i regionalizacije Srbije kroz procese evropskih integracija;

d) obezbjeđivanje ostvarivanja individualnih i kolektivnih prava Bošnjaka garantovanih Ustavom, zakonima i međunarodnim dokumentima;

e) obezbjeđivanje usaglašavanja nacionalne strukture u policiji, sudstvu, tužilaštvu i ostalim državnim organima, institucijama i službama sa javnim ovlaštenjima u Sandžaku sa nacionalnom strukturom stanovništva u sandžačkim opštinama;

f) obezbjeđivanje ostvarivanja svih nadležnosti i prava Bošnjačkog nacionalnog vijeća;

V

Potpisnice će afirmisati i podržavati ideju jedinstvene i autonomne Islamske zajednice čiji velikodostojnici i predstavnici neće učestvovati u političkom životu, političkim kampanjama, niti će se svrstavati uz bilo koju političku stranku.

VI

Potpisnice će omogućiti obostrano učešće u vlasti u sandžačkim opštinama, pravljenjem novih koalicija ili proširivanjem postojećih, što će se regulisati posebnim sporazumom.

Sporazumi o učešću u vlasti na nivou lokalnih samouprava moraju biti u svemu saglasni sa ovom Deklaracijom.

VII

Potpisnice će uspostaviti užu saradnju i na nivou republičke vlasti, uključujući personalna i kadrovska rješenja, ukoliko za to postoji interes i potreba druge potpisnice, a naročito o realizaciji razvojnih i infrastrukturnih projekata u sandžačkim opštinama.

Potpisnice će se dogovarati o eventualnoj podršci i zauzimanju zajedničkih stavova o zakonima, uredbama, odlukama, deklaracijama, rezolucijama i drugim aktima koje donosi Narodna skupština Republike Srbije, Vlada i drugi državni organi, a kojima se na bilo koji način tretiraju položaj i prava Bošnjaka i Sandžaka.

VIII

Potpisnice se obavezuju da u lokalnim samoupravama u Sandžaku, u kojima učestvuju u vlasti, omoguće ostvarivanje nadležnosti Bošnjačkog nacionalnog vijeća, u oblastima propisanim Ustavom i zakonom.

Potpisnice se obavezuju da lokalne samouprave u Sandžaku, u kojima učestvuju u vlasti, budžetima predvide adekvatna sredstva za finansiranje redovnog rada Bošnjačkog nacionalnog vijeća, u skladu sa zahtjevom Vijeća, te da ista redovno uplaćuju.

IX

Potpisnice su saglasne da će na narednim izborima za Bošnjačko nacionalno vijeće ostvariti blisku saradnju, sa ciljem zajedničke podrške onoj izbornoj listi koja će svojim planom i programom doprinijeti poboljšanju sveukupnog položaja Bošnjaka i većem stepenu ostvarivanja njihovih prava na temelju zakonom propisanih nadležnosti Bošnjačkog nacionalnog vijeća.

X

Potpisnice će zajednički promovisati i realizovati ovu Deklaraciju, uzdržavajući se od retorike, izjava i javnih istupa koji nisu u duhu Deklaracije i njenih proklamovanih ciljeva.

XI

Implementacija ove Deklaracije u nadležnosti je koordinacionog tijela.
Koordinaciono tijelo je sastavljeno od po tri predstavnika potpisnica ove Deklaracije.

XII

Prije potpisivanja, Deklaracija mora biti prihvaćena i usvojena od odgovarajućih organa potpisnica, u skladu sa ovlaštenjima propisanim statutima potpisnica.

XIII

Deklaracija stupa na snagu danom njenog potpisivanja.

U Novom Pazaru, 20. decembra 2016. godine

Sandžačka demokratska partija


PREDSJEDNIK

Nihad Hasanović



Stranka demokratske akcije Sandžaka





PREDSJEDNIK

Dr. Sulejman Ugljanin